

Inuunnerup naalernerani eqqarsaatit





Imarisai:

- 5 Inuunnerup naalernerani eqqarsaatit
- 7 Inuunerup naggataanik naleqartumik inuuneq
- 9 Qanigisanik ernummateqarneq
- 9 Siusinnerusukkut toqusoqartillugu
iliuuserisimasat eqqarsaatigikkit
- 10 Inuunerisimasap nalilersorneqarnera
- 10 Isumakkeerinnigit – eqqarsaatikkulluunnit
- 13 Inuunerpit sinnera qanoq atorusunnerlugu
qularnaaruk
- 13 Qimagassatit eqqaamasassikkit
- 14 Qanigisavit najornerat artornarsinnaavoq
- 14 Qanigisannut unneqqarinniarlutit misiliguk
- 14 Toqunissaq pillugu palasi tarnillu pissusiinik
ilisimasalik atorsinnaavat



Inuunnerup naalernerani eqqarsaatit

Ullut ilaanni tamatta toqusussaalluta nalunngilluinnaraluarlugu taamaattoq qoqassineqartutut misigisarpugut, namminermit toqunis-sarput ulluinnarni eqqarsaatigineq ajoratsigu. Ullulli ilaanni paasigutsigu nammineq imaluunniit qanigisatta ilaat toqusussannqortoq, avaqqussinnaajunnaartarparput allatut ajornartumik inuuneq killeqartoq.

Amerlasuut paasillugu inuuneq sivirusjunnaartoq tamanna artornar-nartittarpaat. Kisimiillunilu tamanna nammassagaanni ilatsinnut artornarluinnartarpoq taamaattumillu piffissap ilaani ikiorneqarnis-saq pisariaqartinneqartarluni.



Inuunerup naggataanik naleqartumik inuuneq

Taamaakkaluartoq toqup avaqqunneqarsinnaannginnera-
nik paasinnineq artornartuinnaanngilaq.

Periarfissaaqarpormi nammineq aalajangeeqataaffigissallu-
gu inuunerup naggataa qanoq ittuussanersoq.

Ataasiakkaat imaluunniit ilaqutariit atorsinnaasaat ataani
allaqqasut ilitsersuutaasinnaapput inuunermik naleqartit-
sinermut tapertaasinnaasut.



Qanigisanik ernummateqarneq

Inuunissaq sivikilligaangat qanigisanik ernumaginninneq amerlasuut misigisarpaat. Aningaasatigut atukkat artorsaataassappat?

Aappaasoq illumiiginnarsinnaava? Meeqqat siunissamut ingerlallualereerpat? Meeqqat pillugit isumannaarisariaqarpa?

Imminnut asattuukkusunneq pissutigalugu tamakku ilaanni oqaloqatigiissutiginngitsoorneqartarput, amerlasuutigulli oqiliallaataasartorujussuvoq eqqartuigaanni taamaatuttaaq paaseqatigiittoqarsinnaalluni qanoq ittunik atugassaqarnerluni.

Apeqqutit qularnaarniaraanni pisariaqalersinnaavoq Inunnik isumaginninnermi siunnersortimik, aningaaserivimmi sullissisumik imaluunniit inatsilerituumik ikiortissarsiornissaq.

Kiisalu qularunnaarutaasinnaavoq sumi ilisaarusunnerluni toqqaaraanni kiisalu ilisaanermi qanoq pisoqassaneranik kissaateqaraanni.

Siusinnerusukkut toqusoqartillugu iliuserisimasat eqqarsaatigikkit

Nammineq nappaateqaraanni iluarsineqarsinnaanngitsumik taava siusinnerusukkut toqusoqarsimatillugu atorsimasat tunngavigineqarsinnaapput.

Ilaquttavit ilaat eqqissinartumik toqqissilluni qimagussimappat tamanna ikiuutaalluarsinnaavoq. Taamaattorli qanigisavit ilaat naalliulluni toqujartortoq misigisimagukku tassunga tunngasut misigissutsit utersaartoorutigisinnaavatit artornartutullu misigalugit.

Immikkut ilisimasalinnit, soorlu tarnip pissusiinik ilisimatuumit ikiorneqarnissaq amerlasuutigut pisariaqalersinnaavoq.

Inuunerisimasap nalilersorneqarnera

Inuunerup naalernerani amerlasuut inuunermik siunertaanik paa-sinnikkusuttarput. Imaassinnaavoq pereersimaasut itisilerneqar-nissaat pisariaqartinneqartoq.

Inuunermik qaqilerinninneq qanorluunniit ukioqaraluaaraanni amer-lasuunit qamuuna toqqissinartinneqartarpoq.

Nalillerneqartarpormi inuuneq atorsimasaq. Ilaasali nassuerutigisari-aqartarpaat inuunertik ilaatigut kissaatigisaralumittut atorsimana-gu.

Qaqilerineq kingumut qviarnermik imaqartarpoq aammali piffissap sinneruttup qanoq atorneqarnissaanik tikkuussisinnaalluni.

Siunissaq sivikilligaluartoq iliuuseqarsinnaajunnaarnermik kingune-qartariaqanngilaq. Imaassinnaavoq piffissatsialanngortoq aaqqinne-qarsimanngitsunik aaqqiivigininnissamut taamaallunilu qamuu-na eqqissineq anguneqarsinnaalluni.

Isumakkeerinnigit – eqqarsaatikkulluunnit

Inuunerpit ilaani tarnikkut ikeqalersimaguit taakkuningga sammisa-qarnissannut piffissap sinnera atorsinnaavat. Taamaaliornikkut kikkut isumakkeerfigissanerlugit kiisalu kikkunnit isumakkeerfigineqaru-sunnerit qularnaassagaluarpat. Qangali isumakkiigassaraluit naam-massillugit oqiliallannartarpoq, imaanngilaq toqqarlugit inuttaan-nut apuuttariaqartut amerlasuutigummi eqqarsaatikkut isumak-keerinninneq aamma oqiliallaataasarpoq. Imminut pisuutinnerit kannngusuutillu pillugit aamma imminut isumakkeerfiginissaq mi-silinneqarsinnaavoq. Isumakkeerfiginninnerup aqputaa artornar-sinnaavoq aamma immaqa imminut isumakkeerfigineq tamanit artornarnerpaavoq. Taamaakkaluartog amerlanersatta tamanna pisariaqartippaat amerlanerpaammi piffissap ilaani iliuuseqartarput kannngusuutigisaminnit imaluunnit isumakuluutigiuakkaminnik.





Inuunerpit sinnera qanoq atorusunnerlugu qularnaaruk

Toqu tamatta naluarput qanorlu iliuuseqarfigisallugu nalunarluin-narpoq. Kræftemik nappaateqartut ilaat nakorsanut narrutsassima-sarput, allat qanigisaminnut kamaqalersinnaapput taakkua inuuin-nartussanngormata. Amerlasuullu killiffitsik pillugu soriusissaa-rulluinnarnermik misigisarput.

Piffissaq tamanna sivikissinnaavoq sivirusinnaallunilu piffissalli ingerlanerani inissisimaffik eqqissinartumik akuerineqarsinnaavoq. Taamaattumik piffissap sinneruttup qanoq ittussaananerik naliler-suinissaq aallarniutaalluarsinnaavoq.

Kræftemik nappaateqartut ilaasa "Iliuusissatut pilersaarusiamik" piareersagaqarnertik nuannersumik kinguneqartittarpaat.

Taamaaliornermik angumererusutatik allattortarpaat. Taamatut pilersaarusiorneq ilaasa allamut saasaatigisarpaat inuunerullu taa-maallaat maannakkut misiginissaanut isumaanullu samminnis-saminnut ikiuutigisarlugu.

Qimagassatit eqqaamasassikkit

Asasanit qimagassanit puigorneqarnissaq amerlasuut ajornerpaatut misigisarpaat.

Amerlasuutigut ilinnut imaluunnit qanigisannut ikiuutaasinnaavoq allagaqaruit. Allakkat illit qanigisavillu ataatsimut misigisaannik ima-qarsinnaapput aamma illit qimatavit inuunissaanut kissaatigisatit allaaserisinnaavatit. Assit aaqqissorsinnaavatit oqaasertalersorlugit.

Toqulersut ilaasa meeqqatik allaffigisarpaat. Taakku apersortinnermi /qeqarnermi, inuuissiornermi imaluunnit allatut nalliussinermi atuar-neqartussatut allagaasarput. Periarfissat allat tassaasinnaapput im-miussissummut imaluunniit videomut immiussinerit. Taakkua mee-qamut kingusinnerusukkut nuannaarutaallutillu tapersersuutaa-sinnaapput.

Qanigisavit najornerat artornarsinnaavoq

Piffissaq ornigaq toqujartorfik ilinnut qanigisannullu oqitsuunnigilaq. Assigiinnigitsunik qisuariartaaseqarneq pillugu akuersaarinninneq ataqqinninnerlu pingaaruteqarput. Tamanna tamanut sapernarsinnaavoq tamassi sanngiissinnaagassi puffajasinnaallusilu. Ilaquttat, ikinngutit nalunngisallu ilaasa qanoq qisuariassallutik iliusallutillu nalusarpaat. Imaassinnaavoq ilaasa ima artornartitsigigaat allaat aggiunnatik. Tamanna pakatsinartorujussuusinnaavoq. Aammali imaassinnaavoq allat tupaallaatigisannik isumassuinerusut.

Qanigisannut unneqqarinniarlutit misiliguk

Qanigisanut qanilaartuunissaq unneqqarinnissarlu pingaaruteqarput. Ilaasa illersuerusunnertik pissutigalugu nappaat, toqu allallu oqaluuserissallugit kissaatigineq ajorpaat. Tamanna immissinnut ungasillallannermik kinguneqarsinnaavoq uffalu tamassi qanilaar-nissaq annertunerpaaq pisariaqartikkaluarlugu. Isumatsannermut ersinermullu akiuutaalluartartoq tassaavoq kis-salaarnertalimmik ataatsimoorfeqarneq.

Toqunissaq pillugu palasi tarnillu pissusiinik ilisimasalik atorsinnaavat

Inuunerminni oqaluffeqarfimmut qanittuusimanngikkaluarlutik to-qujartortut amerlasuut inuunertik toqunissartillu pillugit eqqarsaa-titik palasimut avitseqatigiissutigissallugit nuannaarutigisarpaat. Toqu pillugu ileqqut, periutsit inuunermullu tunngasut apeqqutit palasip ilisimasaqarfigai. Eqqarsaatitit pillugit palasi attavigisinnaavat.

Saqqummersitsisoq:
Neriuffit Katuffiat - 2009 Ilusaa siulleq, naqiternera siulleq
Ilusilersuisoq: inuk Media ApS · Assit © inuk Media ApS
Quppersakkamit uuminnga nutsigaaq: 'Tanker ved livets afslutning'
Nutserisoq: Kirstine Berthelsen



Neriuffiit Kattuffiat
Postboks 1546,
Aqqusinersuaq 48 A,
3900 Nuuk
neriuffik@greenet.gl
www.neriuffik.gl

